

北窗吟草
五言古詩一首

北窗吟

案牘廿餘載，倏忽知命年；性剛才分拙，詎攀青雲緣；
慨然解公印，歸臥溪山邊；屋後理荒蕪，庭前賞芳妍；
青蔬園中種，烹食自甘鮮；檐際鳴晨鳥，林間凝晚煙；
吟詠北窗下，珠璣遍詩篇；讀史慕高義，參禪入幽玄；
毋負平生志，物外任蹁躚。

五言絕句二首

帆

水接長空碧，風追千頃浪。
流光上下間，舟老帆心壯！

江邊吟

薄靄近江灣，飛鴻背日還。
蹁躚翻落處，白葦盡酡顏。

七言絕句五首

夏日驟雨

火輪迸焰漫空馳，過午雲凝吐雨絲。
但見行人驚避走，欣欣草木舞青姿。

吊橋

牽連兩岸吊長空，北往南來擺盪中。
緊握纜繩驚未定，山光水影看朦朧。

詠荷

娟娟粉淡托青莖，藕結塘泥葉競擎。
香蕊迎風添畫意，飛來蛺蝶共詩情。

登嶺

苔階迴望盡青巒，勁草叢中古木殘。
待得振衣峰頂處，長歌但覺碧雲寒。

澗旁小寐

深林幽澗送清涼，解我神疲入夢鄉。
恍惚似聞絲竹奏，還疑仙女起霓裳。

五言律詩九首

幽人

幽人宦不通，深谷宿茅蓬。
野徑邀鳴鳥，疏林攬勁風。
嵐蒸峰掩翠，霞映岫披紅。
回首空山渺，高明寂歷中。

山遊

遠山見淑姿，近嶺氣尤滋。
天曠浮雲縱，谷空野鳥馳。
清溪消庶慮，冷霧泛幽思。
還復來時徑，依依落日遲。

織女怨

銀光蝕玉魂，零淚倚晨昏。
雲隔愁風起，絲懸苦雨翻。
良宵宜託夢，好約永啣恩。
但乞人間巧，機梭莫廢溫。

鄉居

蒹葭繞水涯，翠竹隱人家。
雀逐簷邊戲，煙耽堦際斜。
微風邀夏籟，細雨戀秋華。
最是沉吟處，長溪照彩霞。

歸航

孤帆海上揚，夕照吐迷茫。
浪滾游鱗伏，雲騰矯翼狂。
風燈驚暗霧，艙板畏寒霜。
渺渺天涯客，歸途盡望鄉。

蒔蔬

閒暇就籬圍，蒔蔬樂有依。

培苗鋤未歇，耘草汗頻揮。
青袂披朝霧，酡顏踏夕暉。
但教塵幻裡，裁剪莫心違。

老榕

曲幹蒼髯拂，枝榭雀鳥栖。
和風搖葉影，苦雨潤根泥。
昂首朝雲近，回身暮靄低。
夕陽芳草外，入抱是歸啼。

硬漢嶺遊

古徑尋幽意，峰巖覽翠微。
川迴輕棹隱，市遠俗囂稀。
空谷傳僧磬，清風振我衣。
山中無曆日，野鶴自來歸。

冬雨

客旅逢冬雨，寒涼總自知。
空濛遮遠樹，淅瀝亂清池。
徒嘆流波急，猶憐野草滋。
鄉關何縹渺，觸目是淋漓。

七言律詩十一首

蘭草

夫子援琴歎復彈，深林芒影吐幽寒。
嵐蒸露浥柔芽腋，月落氤迷瘦葉端。
苑裡千株爭艷采，澗旁數瓣抱枯殘。
素心豈作榮華想，但許清芬託翰丹。

三毛故居賦感 并序

余去年旅遊途經已故作家三毛女士曾於臺灣新竹縣五峰鄉清泉租賃之瓦屋前，三毛女士譯作有丁松青神父所著「清泉故事」乙書，因感而賦之。

曲徑登臨瓦屋幽，小窗簾動暗生愁。
花前笑語飄苔石，溪畔沉吟沒鷺洲。
路遠情長緣有盡，雲深夢杳志當酬。
清泉故事何曾了，流水悠悠咽古丘。

傘

收時可杖展如篷，四季皆宜一掌中。
送別橋頭添悵意，邀逢花徑綴情衷。
布緣飛落纖纖影，柄頂撐開款款風。
世路陰晴安可慮，逍遙傘下自心融。

山雨

溟濛如織滿山縈，石徑苔濃草葉青。
霧漫寒林浮幻影，水奔幽澗泛流聲。
曲藤老樹牽愁望，垂壁孤亭帶怯迎。
最是飄搖蕭瑟處，枝頭猶掛數殘英。

古松

甘處崢嶸立苦寒，蒼蒼姿影效龍蟠。
凌霜屈幹心常定，傲雪揚枝氣益寬。
桃李焉能同道列，藤蘿會作矯情盤。
亙古勁節翰丹頌，豈羨嬌顏旦夕安！

雲仙樂園遊

翠巒迤邐貯清幽，結伴雲仙一日遊。
飛瀑迴聲迎吊纜，閒池倒影盪輕舟。
觀林倚石塵心定，踏徑尋溪鳥語柔。
莫道桃源無覓處，此間佳色更悠悠。

淡水河口賦感

逝水悠悠不記年，觀音長伴淡河邊。
灘頭鷺起浮波亂，海際舟迴落日妍。
茶座胡弦驚客夢，榕堤釣餌誘魚鮮。
潮來潮往何曾歇？古渡煙寒向晚天。

註：觀音山坐落於淡水河口處

老兵紀懷二首 并序

民國三十八年，國軍隨政府退守臺灣，已歷五十餘年，其間有不少老兵謝世，無法返鄉與親人團聚，因感其飄泊零落，故賦詩以記之。

其一

風催木落雁南遷，獨倚危樓眺遠天。
半世煙雲驚未定，一腔血淚苦相煎。
烽餘戚友添新塚，膝下兒孫忘故田。
海峽波濤猶詭譎，息爭解戍盼何年？

其二

江山易幟大軍遷，半世煙雲隔海天。
戎馬悲歌何奮勵，鄉關離恨更熬煎。
忍看霜髮添晶鏡，漫灑詩文拓硯田。
還待舊庭重聚日，親朋把盞慶安年！

客來

半窗秋色送清涼，且喜良朋入我堂。
品茗談心情自洽，吟詩弄墨興尤長。
竹聽窗外搖新韻，菊賞籬邊吐晚香。
三徑留連猶悵意，疏林野草透斜陽。

春晨散步

小園漫步沐和風，二月初陽漸暖融。
眸映草芽沾夙露，心隨燕翅剪晴空。
垂楊拂水池添翠，舞蝶巡籬花競紅。
念我青山尤嫵媚，等閒更作竹林翁。

詞兩闋

採桑子 玉樓怨

鴛衾夢斷輕寒透，悵恍悠悠，檐際啁啾，簾外晴光窺室幽。
菱花空對幃屏冷，翠黛凝愁，欲訴無由，徒惹東風探玉樓。

採桑子 春曉

春光挪步和風岸，草露凝晶，蛺蝶尋英，雙燕呢喃柳外迎。
韶華但惜閒情少，底事營營？鬢已星星，悵望晴空雲影輕。